



\*RESPETAMI\* : FOUNDATION AGAINST CHILD SEXUAL ABUSE

## COMUNICADO DI PRENSA

### **Preveni abuso di mucha! Fundacion Respeta Mi cu tv-spot pa yuda mayor educa yiu**

Nos tur sa cu educa yiu no ta un tarea facil. Pesey ta hopi importante pa mayor haya sosten con pa educa nan yiu. Cu un conseho rapido y apropiado por preveni cu problema serio entre mayor y yiu ta sali for di man. Mayoria di biaha cu bon conseho, un mayor ta suficientemente ekipa atrobe p'e mes por sigui cambia e situacion na un manera positivo.

Investigacion mundial ta muestra cu duna sosten na mayor con pa educa yiu tin un rol preventivo y importante. Esaki sigur ta yuda preveni abuso di mucha awor y den futuro. Na Aruba mayor tambe regularmente tin pregunta relaciona cu mihor manera con pa lanta yiu. Tur mayor kier un yiu cu ta comporta su mes bon, pero no por logra esey tur ora. Un bon relacion entre mayor y yiu ta e base pa educa mucha na un manera exitoso.

Pesey e aña aki Fundacion Respeta Mi, cu ta traha riba tereno preventivo di abuso y negligencia di mucha, ta trece pa nos comunidad siete spot pa sostene mayor den e tarea dificil pa educa mucha. For di 11 di Februari por mira e spotnan na TeleAruba, 15 ATV Aruba y riba diferente canal di Cable TV Aruba tres luna largo.

Na The Cinemas at Renaissance tambe por mira e spotnan, pero pa un aña largo. E siete spotnan ta cubri infancia (0-18 aña) pa asina duna sosten na educa mucha, segun edad di e mucha. Na final di cada spot por scucha un tip educativo cu ta acentua e acercamento positivo den un situacion di conflicto.

E tipnan aki ta basa riba principionan educativo for di "Disciplina Consciente" manera

- 1)** Keda comunica; **2)** Carga responsabilidad; **3)** Comportacion positivo;
- 4)** Tin contacto cu wowo; **5)** Scucha, negocia y tuma decision final; **6)** Keda riba bo palabra; **7)** Muestra interes den bo yiu.

Tipnan asina tambe por yuda esnan cu ta traha cu mucha, por ehempel maestro, lider di speelschool/trainer y profesional riba tereno social.

Pa mas informacion tocante curso riba 'Disciplina Consciente' y con pa educa mucha pa tambe por preveni abuso di mucha, tuma contacto cu centro di informacion di Fundacion Respeta Mi, J.E. Irausquinplein 5, Oranjestad, tel. 5824433 of bishita website: [www.respetami.aw](http://www.respetami.aw).

Fundacion Respeta Mi kier gradici CEDE Aruba pa e ayudo financiero, tur actor cu a participa den e spotnan pa nan tempo y dedicacion y Rebecca Roos Productions pa un tremendo produccion.

**Ban preveni abuso di mucha: Un infancia feliz ta dura pa semper!**